

URDHËR

Nr.371, datë 28.7.2011

PËR KRIJIMIN E INSTITUTIT TË GJEOSHKENCAVE DHE ENERGJISË, UJIT DHE MJEDISIT (IGJEUM), PRANË UNIVERSITETIT POLITEKNIK TË TIRANËS

Në mbështetje të nenit 102 të Kushtetutës, të pikës 5 të nenit 4 të ligjit nr.9741, datë 21.5.2007 "Për arsimin e lartë në Republikën e Shqipërisë", të ndryshuar dhe vendimit nr.490, datë 6.7.2011 të Këshillit të Ministrave "Për shfuqizimin e vendimeve nr.560 dhe nr.561, datë 22.8.2007 të Këshillit të Ministrave "Për bashkimin e disa instituteve dhe njësive kërkimore, organizimin e tyre në Institutin e Energjisë, Ujit dhe Mjedisit pranë Universitetit Politeknik të Tiranës dhe funksionimin e Institutit në periudhën kalimtare" dhe "Për bashkimin e disa instituteve dhe njësive kërkimore, organizimin e tyre në Institutin e Gjeoshkencave dhe pranë Universitetit Politeknik të Tiranës dhe funksionimin e Institutit për periudhën kalimtare",

URDHËROJ:

1. Krijimin e Institutin e Gjeoshkencave dhe Energjisë, Ujit dhe Mjedisit, si njësi kryesore, pranë Universitetit Politeknik të Tiranës nga bashkimi dhe riorganizimi i Institutit të Gjeoshkencave dhe Institutit të Energjisë, Ujit dhe Mjedisit.
2. Instituti i Gjeoshkencave dhe Energjisë, Ujit dhe Mjedisit (IGJEUM) ka për mision:
 - a) kërkimin shkencor, bazë dhe të aplikuar;
 - b) formimin universitar të thelluar të studentëve dhe shkencëtarëve të rinj;
 - c) transferimin e njohurive dhe teknologjive, si dhe monitorimet në shkallë kombëtare në fushat e sizmologjisë, hidrometeorologjisë, pasurive natyrore, të gjeoriskut, gjeoinxhinierisë, gjeoinformacionit, klimës dhe mjedisit.
3. Detyrat kryesore të Institutit janë:
 - a) Monitorimi, regjistrimi dhe analizimi i vazhdueshëm i aktivitetit sizmik të vendit, nëpërmjet rrjeteve kombëtare të monitorimit sizmologjik dhe gjeodinamik, si dhe njoftimi në kohë reale i organizmave shtetërorë përgjegjës për emergjencat civile dhe i publikut për rreziqet nga tërmetet;
 - b) Studime të thelluara në fushën e sizmologjisë dhe të sizmotektonikës për tërmetet që godasin vendin tonë;
 - c) Studimi dhe monitorimi i vazhdueshëm i dukurive dhe veprimtarisë hidrologjike, si dhe njoftimi, në kohë reale, i organizmave shtetërorë përgjegjës

- për emergjencat civile dhe i publikut për rreziqet nga përmbytjet;
- d) Studimi i fenomeneve gjeologjike (gjeofizike, gjeokimike, gjeomekanike etj.) dhe ndërtimi i hartave gjeologjike tematike;
 - e) Studimi dhe vlerësimi i pasurive minerale, të materialeve të ndërtimit, burimeve nëntokësore, të energjisë, resurseve ujore nëntokësore;
 - f) Studimi i rreziqeve natyrore (gjeoriskut) dhe të atyre të shkaktuara nga veprimtaria e njeriut (rrëshqitjet, erozionet, përmbytjet, tërmetet, ndotjet, venddepozitat, subsidencat minerare etj.);
 - g) Zhvillimi i modeleve gjeoinformatike;
 - h) Studimi dhe monitorimi i dukurive atmosferike të motit dhe ndryshimeve klimatike, si dhe njoftimi, në kohë reale, i organizmave shtetërorë përgjegjës për emergjencat civile dhe i publikut për rreziqet nga ngjarjet e jashtëzakonshme atmosferike;
 - i) Studimi i gjendjes së mjedisit natyror, nivelit të erozionit dhe të ndotjes së ajrit e të ujërave në tërësi si ato sipërfaqësore dhe nëntokësore;
 - j) Implementimi dhe përdorimi i teknologjive të informacionit dhe të telekomunikacionit për mbledhjen, transmetimin dhe përpunimin e informacionit të sistemeve digjitale në fushat e sizmologjisë e të hidrometereologjisë;
 - k) Formimi universitar, kryesisht në ciklin e dytë dhe të tretë të studimeve, dhe kualifikimi i thelluar i shkencëtarëve të rinj.
4. Struktura e institutit, përbërja, funksionimi, si edhe drejtimi i tij përcaktohen në statutin dhe rregulloret e institucionit të arsimit të lartë. IGJEUM, për shkak të misionit dhe shërbimeve që ofron, fton në mbledhjet e këshillit të institutit një përfaqësues nga Ministria e Punëve Publike dhe Transportit, një përfaqësues nga Ministria e Bujqësisë, Ushqimit dhe Mbrojtjes së Konsumatorit, një nga Ministria e Mjedisit, një nga Ministria e Ekonomisë, Tregtisë dhe Energjetikës, si dhe një përfaqësues nga Ministria e Brendshme. Këta anëtarë të ftuar marrin pjesë në mbledhjet e këshillit të institutit, pa të drejtë vote.
5. Procesi i bashkimit dhe riorganizimit të Institutit të Gjeoshkencave dhe Institutit të Energjisë, Ujit dhe Mjedisit në Institutin e Gjeoshkencave, Energjisë, Ujit dhe Mjedisit të përfundojë brenda datës 15.9.2011.
6. Instituti i Energjisë, Ujit dhe Mjedisit të lirojë objektin "Ndërtesa Qendrore e Institutit të Hidrometereologjisë", Tiranë dhe të transferohet në godinën ekzistuese të Institutit të Gjeoshkencave, brenda datës 31.8.2011.
7. Ngarkohet Sekretari i Përgjithshëm, Drejtoria e Arsimit të Lartë dhe Kërkimit Shkencor në Ministrinë e Arsimit dhe Shkencës, Instituti i Gjeoshkencave dhe Energjisë, Ujit dhe Mjedisit dhe Universiteti Politeknik i Tiranës për zbatimin e këtij urdhri.

Ky urdhër hyn në fuqi menjëherë dhe botohet në Fletoren Zyrtare.

MINISTRI I ARSIMIT DHE SHKENCËS

Myqerem Tafaj

[shqiptarja.com]